

摘藻堂四庫全書薈要

集部

欽定四庫全書會要

集部

甫里集卷一至三

臣王杰詳校

詳校官助教臣常循



欽定四庫全書舊要

甫里集目錄

卷一

五言古詩

卷二

五言古詩

卷三

五言古詩

卷四

五言古詩

附五言排律 七言排律

卷五

五言律詩

卷六

五言律詩

卷七

五言絕句

卷八

七言律詩

卷九

七言律詩

卷十

七言律詩

卷十一

七言絕句

卷十二

七言絕句

卷十三

雜體詩

附聯句

卷十四

賦

卷十五

賦

卷十六

雜著

卷十七

雜著

卷十八

雜著

卷十九

雜著

卷二十

附錄

臣等謹案甫里集二十卷唐陸龜蒙撰龜蒙詩文嘗自編為笠澤叢書其與皮日休唱和之作則多見於松陵集皆別著錄其全集則當時無專本宋寶祐間葉茵始蒐采諸書得遺篇一百七十一首合二書所載四百八十一首共六百五十二首編為十九卷並附錄



總為二十卷林希逸為序刊板置義莊歲久  
闕失明成化丁未崑山嚴景和重刊之於附  
錄之中增胡宿所撰甫里先生碑銘一篇陸  
鉞序之此本乃萬厯乙卯松江許自昌又取  
嚴本重刻於附錄中續增范成大吳郡志一  
條王鏊姑蘇志一條其餘詩十三卷賦二卷  
禋文四卷則悉依舊次葉本所附顏萱過張  
祐丹陽故居詩序龜蒙特屬和而已其事不

應附之于集胡宿碑銘姑蘇志云其碑亡嚴氏所錄蓋据集本宿集載永樂大典中意成化中尚未佚也希逸序中辨詔拜拾遺一事極精核足證新唐書之誤茵於楊億談苑所載彈鴨一事反覆推論殊為無謂文人游戲亦復何關於賢否而力爭以為必無亦可謂迂拘之甚矣乾隆四十二年三月恭校上

總纂官臣紀昀臣陸錫熊臣孫士毅

總校官臣陸費墀



甫里集原序

漢而下史錄諸家名集其殘缺不完失滅不可見如歐陽公所歎者不知其幾百氏也方其存時或託之交游授之門人付之孫子豈不欲其必傳傳之必遠要之皆不可必其間乃有出于破囊敗度之中幾廢而幸存若子雲不必侯芭太白不必陽冰退之不必李漢子厚不必禹錫千載而後往往不期而得之是豈偶然者甫里先生之沒去今幾百載矣遺稿所存僅有松陵笠澤二

書其詩似陳拾遺其文似元道州平居以文章自怡雖幽憂疾病無旬日生計未嘗暫輟塗竄則其平生所著豈應止爾常以棄珠遺璧為恨今吳江葉君茵乃作意掇拾而裒益之懇懇勤勤若褚先生之于史記張處度之于沖虛經網羅放失將必有續得而未已者於先生何忠哉先生之亡研墨泚筆者雖穉紫溪翁鹿門子諸賢皆平昔所深交者豈無一人可任此責苟有焉亦不至散軼如此視葉君殊有愧矣然史稱盧攜李蔚素與

善及當國召拜拾遺詔方下而先生卒以史考之盧李  
皆相于乾符元年五年皆罷而叢書自序乃曰乾符六  
年卧病笠澤是二人既罷而先生猶無恙也若曰六年  
之冬攜嘗再相則與李蔚無與矣然攜附田令孜以進  
卒為所擠而死使先生猶在亦豈斯人可致哉史氏之  
云若以此為先生惜者誤矣寶祐六年冬十有一月朝  
請郎直寶謨閣林希逸序

長洲甫里為唐陸魯望先生之隱處故自號甫里先生

蓋以地也去今六百餘祀而流風不泯舊跡猶存遺文俱墜崑山嚴景和氏居松江之泖密邇甫里欽甫里之文乃訪而重刻之謂予不可以無序也予知陸氏為吳郡四姓之舊晉平原內史陸士衡之詩曰四姓實名家者為可徵焉至先生以高節稱而世併貴其文當時殷文珪覽其舊集曰文價沸乎三吳而類唐賦者至與裴晉公白文公之作同編其所著有吳興實錄四十卷松陵集十卷晁氏曰凡六百五十八首笠澤叢書四卷陳



氏曰甲乙丙丁詩文雜編朱袞刊於吳江末有四賦用  
蜀本增入蜀本七卷樊開所序案開序止曰八十餘篇  
而不曰四卷與陳氏所計七卷之數不合叢書松陵集  
總六百五十二篇併附錄為二十卷闕晁氏所校松陵  
集六篇刊于宋寶祐中歷勝國以來歲久板廢景和所  
為重刊者繼前賢之勝事誠義舉也而叢書四卷七卷  
八十餘篇之數無從補刊矣先生自言平居以詩文自  
怡點竄塗抹歷年不能淨寫一本或為好事者取去鄙

陽馬氏錄書有小名錄三卷周密齊東野語曰先生祠在白蓮寺中像設皆唐物咸淳中盛氏子醉仆其像于水滿腹皆平生詩文新稿知府倪普更為像腹稿不可復得矣序列先生所著書無小名錄集中亦不見序述或在所逸之中豈同與詩文為好事者取去後出而傳於今耶抑如晁氏所論無異聞而不書耶所謂腹藏新稿或叢書等成集之後先生既沒尚未有編次者耶殷文珪所覽舊集或吳興實錄或叢書或松陵集蓋不可

知豈已編者為舊集未編者為新稿因置腹中故有新  
舊之分耶是知先生之制作不獨遺逸于當時復遭棄  
毀于後代為可惜也然其所以為貴者豈專在于文哉  
惟其立節之高而已夫文以昭其節也節以表其文也  
使徒文焉而節有不立則文者流于一藝又何足貴乎  
先生之生適丁季唐一不中進士舉知世之不可為也  
以高士召不至史稱盧攜李蔚當國召拜左拾遺詔下  
而卒希逸辨其不然且曰有之決不為盧攜輩所致可

謂得其心矣至於楊文公談苑所紀內養彈鴨事詩家  
多喜引用茵即故實辨其為誣又以談苑為別有所據  
考之文公亦曰出于相傳由其一時輕信耳非別有所  
據云以余觀于司空圖咸通中及第避亂隱中條山僖  
宗以中書舍人徵拜禮戶二部侍郎皆不起又以病辭  
朱梁禮部尚書之徵梁史書之殊為失真賴王元之據  
事考言明其制行之卓幸不污曲筆其事殆與魯望類  
而節行亦相似譬猶天麟不觸世網雪鶴自超雞群也

方之王維鄭虔皆能文辭書畫皆入妙品皆污偽官不能行鄭相如守節可免之言以至於失身後雖皆以詩畫得苟免而良史氏散袞缺鉞褒貶之公詎可廢哉因牽聯以書用存素王勸懲之法皮襲美稱魯望之才不減溫庭筠李商隱蘇長公稱表聖詩文高雅有承平之遺風可謂確論矣表聖之集曰一鳴景和尚求之藏書之家與甫里集偶刻並傳俾讀者因其言而得其節行之詳知其不為徒文而明于出處之義流播千載為不朽

事則于名教之益也豈小小哉成化丁未春正月邑人

陸鉞書

欽定四庫全書薈要卷一萬四千七十六

集部

甫里集卷一

唐 陸龜蒙 撰

五言古詩

讀襄陽耆舊傳因作詩五百言寄皮襲美

日休字也

漢皋古來雄山水天下秀高當軫翼分化作英髦  
秦之前人灰滅不可究自從宋生賢特立冠耆舊  
離騷

既

一作紀

日月九辯即列宿卓哉悲秋辭合在風雅右  
龐

公樂幽隱辟聘無所就祇愛鹿門泉泠泠倚巖漱孔明  
卧龍者潛伏躬耕耨忽遭玄德雲遂起麟角鬪三胡節  
皆峻二習名亦茂其餘文武家相望如斥堠緬思齊梁  
降寂寞寡清曹凝融為漪瀾復結作瑩琇不知粹和氣  
有得方大受將生皮夫子上帝可其奏并包數公才用  
以殿厥後嘗聞兒童歲嬉戲陳俎豆積漸開詞源一派  
分萬溜先崇孔周室大懼隳結構次補荀孟垣所貴亡  
罅漏仰瞻三皇道蟣虱在宇宙却視五霸圖股掌弄孩



幼或能醢髀或與翼鵲或喜掉直舌或樂斬邪脰  
或耨鉏翳薈或整理錯謬或如百千騎合沓原野狩又  
如曉江平風死波不皺幽埋力須掘遺落貲必購乃于  
文學中十倍猗頓富囊乏向咸鎬馬重遲步驟專場射  
策時縛虎當羿彀歸來把通籍且作高堂壽未足逞戈  
矛誰云被文繡從知偶東下帆影拂吳岫物象悉摧藏  
精靈畏雕鏤伊余抱沈疾顛顚守圭竇方推洪範疇更  
念大玄首

去聲

陳詩採風俗學古窮篆籀朝朝貫薪米往

往逢責詬既被隣里輕亦為妻子陋持冠適甌越敢怨  
不得售窘若曬沙魚悲如哭霜狔唯君枉車轍以逐海  
上臭披襟兩相對半夜忽白晝執熱濯清風忘憂飲醇  
酎驅為文翰侶駕阜參驥廐有時諧宮商自喜真邂逅  
道孤情易苦語直詩還瘦藻匠如見訓終身致懷袖

襲美先輩以龜蒙所獻五百言既蒙見和復示榮  
唱至于千字提獎之重茂有稱實再抒鄙懷用

伸酬謝

洪範分九疇轉成天下規河圖孕八卦煥作玄中竒先  
開否臧源次築經緯基粵若魯聖出正當周德衰越疆  
必載質歷國將扶危諸侯恣崛强王室方陵遲歌鳳時  
不偶獲麟心益悲始嗟吾道窮竟使空言垂首贊五十  
易又刪三百詩遂令篇籍光可並日月姿向非筆削功  
未必無瑕疵迨至夫子沒微言散如枝一作披所宗既不  
同所得亦異宜名法在深刻虛玄致希夷自從戰伐來  
一派縱橫馳寒谷生艷木沸潭結流澌驚奔失壯士好

惡隨纖兒羸氏并六合勢尊丞相斯加于挾書律盡取

坑焚之南勒會稽頌北恢胡亥阨猶懷徧巡狩不暇親

維持及漢文景後鴻生方振規

出三都賦

簸揚堯舜風反作

三代吹飄飄四百載左右為藩籬鄴下曹父子獵賢甚

熊羆發論若霞駁

魏文帝典論有論文篇

裁詩如錦摛徐王應劉

輩頭角咸相衰

初危切

或有妙絕賞或為獨步推或許潤

色美或嫌詆訶癡倏以中利病且非混醇醪雅當乎魏

文麗矣哉陳思不肯少選妄恐貽後世嗤吾祖仗才力

士衡  
文賦

革車蒙虎皮手持一白旄直向文場麾輕去若脫

鉗欽豁如抽戾戾

上琰下移

精鋼不足利騷裏何勞追大可

罩山岳微堪析毫釐十體免負贅百家咸起痿爭入鬼

神奧不容天地私一篇邁華藻萬古無子遺刻鵠尚未

已雕龍奮而為

劉勰有文心雕龍

劉生吐英辯上下窮高卑下

臻宋與齊上指軒從義豈但標八索殆將包兩儀人謠

洞野老騷怨明相累立本以致詰驅宏來抵讖清如朔

雪嚴緩若春煙羸或欲開戶牖或將飾纓綈雖非倚天

金  
劔亦是囊中錐皆由內史意致得東莧詞梁元盡索虜

後主終亡隋哀音但浮脆豈望分雄雌吾唐揖讓初陞

列森咎夔作頌媿吉甫直言過祖伊明皇踐中日墨客

肩參差岳淨秀擢削海寒光陸離皆能取穴鳳盡擬乘

雲螭邇來二十祀俊造相追隨余生落其下亦值文明

時少小不好弄逡巡奉弓箕雖然苦貧賤未省親嚅呬

一作  
晚 秋倚抱風桂曉烹承露葵窮年只敗袍積日無晨

炊遠訪賣藥客閒尋捕魚師歸來蠹編上得以舍情窺

抗韻吟比雅覃思念梔攤因知昭明前剖石呈清琪又  
嗟昭明後敗葉埋芳蕤縱有月旦評未能天下知徒為  
強鰐豹不免參狐狸誰蹇行地足誰抽刺天髻誰作河  
畔草誰為洞中芝誰若靈囿鹿誰猶清廟犧誰輕如舉  
毛誰密如凝脂誰比蜀嚴靜誰方巴賈貲誰能釣扑鰲  
誰能灼神龜誰背如火水誰同若墳簾誰可作梁棟誰  
敢驅谷蠡

鹿黎  
二音

用此常不快無人動交鉞空消病裏骨

枉白愁中髭鹿門先生才大小無不怡就彼六籍內說

詩直解頤顧我迷未遠開懷潰其疑初開鑿本源漸乃  
疏旁支邃古派泛濫皇朝光赫曦揣摩是非際一一如  
襟期李杜氣不易孟陳節難移信知君子言可並神明  
著枯腐尚求律膏肓猶謁醫況將太牢味見啗逋懸飢  
今來置家地正枕吳江湄餌薄鈎不曲足然守空坻嘿  
坐無影響唯君欵茅茨抽書亂籤帙酌茗煩甌犧或伴  
補缺砌或偕詣荒祠孤筇倚煙蔓細木橫風漪觸雨妨  
扉屢臨流泥江離既狎野人調甘為豪士訾不敢負建



鼓唯憂掉降旗希君念餘勇挽袖登文陣

奉詔襲美先輩吳中苦雨一百韻

微生參最靈天與意緒拙人皆機巧求百逕無一達家

為唐臣來奕世唯稷卨只垂清白風凜凜自貽厥

龜蒙五代

祖六代祖皇朝繼在台輔

猶殘賜書在編簡苦斷絕其間忠孝字萬

古光不滅辱孫誠曾昧有志常楫楫敢云嗣良弓但欲

終守節誼譁不入耳讒佞不挂舌仰詠堯舜言俯遵周

孔轍所貪既仁義豈暇理生活縱有舊田園拋來亦蕪

沒因之成否塞十載真契闊凍肝一膽禴飢腸少糠粃

甘心付天壤委分任迴幹笠澤卧孤雲桐江釣明月盈

筐盛芡芰滿釜煮鱸鱖酒幟風外飮茶槍露中擷

茶芽未展

者曰槍已展者曰旗

歌謠非大雅捃摭為小說上可補薰莖傍堪

蹴芽蘗

龜蒙嘗著稗說三卷

方當賣罽罽盡以易紙札蹤跡尚吳

門夢魂先魏闕尋聞天子詔赫怒誅叛卒宵旰憫烝黎

謨

一作暮

明問征伐王師雖繼下賊壘未即拔此時淮海

波半是生人血霜戈驅少壯敗屋棄羸羸踐蹋比塵埃

焚燒同稿秸吾皇自神聖執事皆間傑射策亦何為春  
卿送聊輟伊余將貢技未有恥可刷却問漁樵津重耕  
煙雨塏諸侯急兵食冗贖方翦截不可抱詞章巡門事  
干謁歸來闔蓬楗壁立空豎褐煖手抱孤煙披書向殘  
雪幽憂和憤懣忽愁自驚蹶文兮乏寸毫武也無尺鐵  
平生所韜蓄到死不開豁念此令人悲翕然生內熱加  
之被輟瘃況復久藜糲既為霜露侵一卧增百疾筋骸  
將束縛腠理如箠撻初謂抵狂軀又疑當毒蝎江南多

事鬼巫覡連甌粵可口是妖訛恣情專賞罰良醫只備  
位藥肆成虛設而我正萎瘵安能致訶吐椒蘭任芳苾  
精柵從羅列醢竿既屢傾錢刀亦隨蕪兼之瀆財賄不  
止行盜竊天地如有知微妖豈逃殺其時心力憤益使  
氣息惛永夜更呻吟空牀但皮骨君來贊賢牧野鶴聊  
簪笏謂我同光塵心中有溟渤輪蹄相壓至問遺無虛  
月首到春鴻濛猶殘病根茆看花雖眼暈見酒忘肺渴  
隱几還自怡逢盧亦爭唱抽毫更唱和劒戟相磨夏何

大不包羅何微不挑剔今來值霖雨晝夜無暫歇雜若  
碎淵淪高如破轆轤何勞鼉吼岸詎要鸛鳴埵祗意江  
海翻更愁山岳裂初驚蚩尤陣虎豹爭搏噬又疑伍胥  
濤蛟蜃相蹙撈千家濛濛練忽似好披拂萬瓦垂玉繩  
如堪取縈結況余居低下本是蛙蚓窟邇來增號呼得  
以恣唐突先夸屋舍好又恃頭角凸厚地雖直方身能  
徧穿穴常參莊辯裏亦造楊玄末偃仰縱無機形容且  
相忽低頭增歎訛到口復嗚咽沮洳漬琴書莓苔染巾

襪解衣換倉粟秕稗猶未脫飢鳥屢窺臨泥僮苦舂師

音伐或聞秋稼穡大半沈彭汜耕父蠹齊民農夫思旱魃

吾觀天之意未必洪水割且要虐飛龍又圖滋跛鼈三

吳明太守左右皆儒哲有力即扶危懷仁過救暍鹿門

皮夫子氣調真俊逸截海上雲鷹橫空下霜鵲文壇如

命將可以持玉鉞不獨宸羲軒便當城老佛顧余為山

者所得纔簣撮譬如飾箭材尚欠鏃與筈間將飲兒唱

強倚帝子瑟幸得遠瀟湘不然嗤賈屈開緘窺寶肆璣

貝光比櫛朗詠衝樂懸陶匏嚮鏗搗古來愁霖賦不是  
不清越非君頓挫才沴氣難摧折馳情扣虛寂力盡無  
所掇不足謝徽音祇令凋鬢髮

奉酬襲美先輩初夏見寄次韻

積雨晦皋圃門前煙水平蘋蘩增遙吹枕席分餘清村  
旆詫酒美賒來滿經程一作  
鉉未必減宣子何羨謝公榮

借宅去人遠敗牆連古城愁鴟占枯枿野鼠趨前楹昨  
日雲破損晚林先覺晴幽篁倚微照碧粉含疎莖蠹簡

有遺字敍琴無泛聲蠶寒蠶尚薄驚喜雛新成覽物正  
搖思得君初夏行誠明復散誕化匠

一作  
化工

安能爭海浪

刷三島天風吹六英洪崖領玉節坐使虛音生吾祖傲  
洛客因言幾為傖末裔寔漁者敢懷干墨卿唯思釣璜  
老遂得持竿情何須乞鵝炙豈在斟羊羹畦蔬與甕醪  
便可相攜迎蟠木几甚曲筍皮冠且輕閒心放羈勒醉  
脚從鼓傾一逕有餘遠一窻有餘明秦皇苦不達天下  
何足并



奉和襲美二遊詩

徐詩

嘗聞四書曰經史子集焉苟非天祿中此事無由全自  
從秦火來歷代逢述邇漢祖入關日蕭何為政年盡力  
取圖籍遂持天下權中興熹平時教化還相宣立石刻  
五經置于太學前賊卓亂王室君臣如轉圜洛陽且煨  
燼載籍宜為煙逮晉武革命生民纔息肩惠懷亟寡昧  
戎羯俄腥羶已覺天地閉競為東南遷日既不暇給墳

索何由專爾後國脆弱人多尚虛玄任學者得謗清言  
者為賢直至沈范輩

沈約范雲皆  
藏書數萬卷

始家藏簡編御府有

不足仍令就之傳梁元渚宮日盡取如蚺蜥兵威忽破

碎焚藝無遺篇近者隋後主搜羅勢駢闐寶函映玉軸

彩翠明霞鮮伊唐受命初載史聲連延砥柱不我助驚

波湧淪連遂令因去

一作  
往古

書半在餘浮泉貞觀購亡逸

蓬瀛漸周旋晃然東壁光與月爭流天偉矣開元中王  
道真平平八萬五千卷一一皆塗鉛人間盛傳寫海內

奔窮研目云西齋書有過東臯田吾聞徐氏子奕世皆  
才賢因知遺孫謀不在黃金錢插架幾萬軸森森若戈  
鋌風吹籤牌聲滿室鏗鏘然佳哉鹿門子好問好除瘡  
候來參卿處遂得參卿憐開懷展櫺簾唯在性所便素  
業已千仞今為峻雲巔雄才舊百派相近浮日一作川  
君抱王佐圖縱步凌陶甄他時若報德誰在參卿先

任詩

吳之辟疆園在昔勝概敵前聞富脩竹後說紛怪石

陵竟

子陸羽翫月詩云辟疆  
舊林閬怪石紛相向

風煙慘無主載祀將六百草色

與行人誰能問遺跡不知清景在盡付任君宅却是五  
湖光偷來傍簷隙出門向城路車馬聲躑躅入門望亭  
隈水木氣岑寂隼牆繞曲岸勢似行無極十步一危梁  
乍疑當絕壁池容澹而古樹意蒼然僻魚驚尾半紅鳥  
下衣全碧斜來島嶼隱恍若瀟湘隔雨靜挂殘絲煙消  
有餘脈竭來任公子擺落名利役雖將祿代耕頗愛巾  
隨策秋籠支遁鶴夜榻戴顓客說史足為師譚禪差作

伯君多鹿門思到此情便適偶蔭桂堪帷縱吟苔可席  
顧余真任誕雅遂中心獲但喜醉還醒豈知玄尚白甘  
閒在雞口不貴封龍額即此自怡神何勞謝公屐

次追和清遠道士詩韻

一代先後賢聲容劇河漢況茲邁古士復歷蒼崖竄辰  
經幾十萬邈與靈壽翫海嶽尚推移都鄙固蕪漫羸僧  
下高閣獨鳥沒遠岸嘯初風雨來吟餘鐘唄亂如何鍊  
精魄萬祀忽欲半寧為斷臂憂肯作秋柏散吾聞艷宮

內日月自昏旦左右脩文郎縱橫灑篇翰斯人久冥漠  
得不垂慨歎庶或有神交相從重興讚

補沈恭子詩

并序

案清遠道士詩題中有沈恭子同遊既為神怪之儔  
得非姓氏謚為恭子乎

一作若

趙宣子韓獻子之類耶

恭子美謚也而詩中有風流詞翰之稱豈獨唱而不  
和者歟疑闕其文以為恭子之恨乃作一章存于編  
中亦補亡之義也

靈質貫軒昊遐年越商周自然失遠裔安得怨寡儔我  
亦小國盾易名慙見優雖非放曠懷雅奉逍遙遊攜手  
桂枝下屬詞山之幽風雨一以過林麓颯然秋落日倚  
石壁天寒登古丘荒泉已無夕敗葉翳不流亂翠缺月  
隱衰紅清露愁覽物性未逸反為情所囚異才偶絕境  
佳藻窮冥搜虛傾寂寞音敢作雜珮紉

南里集卷一



欽定四庫全書薈要卷一萬四千七十七

集部

甫里集卷二

唐 陸龜蒙 撰

五言古詩

讀陰符經寄鹿門子

清晨整冠坐朗詠三百言  
備識天地意獻詞犯乾坤  
何事不隱德降靈生軒轅  
口銜造化斧鑿破機關  
門五賊忽迸逸萬物爭崩奔  
虛施神仙要莫救華池源  
但學戰

勝術相高甲兵屯龍蛇競起陸鬪血浮中原成湯與周  
武反覆更為尊下及秦漢得

一作傳

黷弄兵亦煩姦強自

林據仁弱無枝蹲狂喉恣吞噬逆翼爭飛翻家家伺天  
發不肯匡淫昏生民墜塗炭比屋為冤魂祇為讀此書  
大樸難久存微臣與軒轅亦是萬世孫未能窮意義豈  
敢求瑕痕曾亦愛兩句可與賢達論生者死之根死者  
生之根方寸了十字萬化皆胚暉身外更何事眼前徒  
自喧黃河但東注不見歸崑崙晝短苦夜永勸君傾一

樽

奉和初夏遊楞伽精舍次韻

吳都涵汀洲碧液浸郡郭微雨蕩春醉上下一清廓奇  
蹤欲探討靈物先瘳瘼飄然蘭葉舟旋倚煙霞泊吟譚  
亂篙艣夢寐雜巖嶸纖情不可逃洪筆難暫閣豈知楞  
伽會一作舍乃在山水箔金仙著書日世界名極樂蒼蘊  
冠諸香琉璃代華璽禽言經不輟象口川寧涸萬善峻  
為城巉巉扞群惡清晨欲登造安得無自愕險穴駭坤

牢高蘿挂天索池容澹相向蛟怪如可摸苔蔽石髓根

蒲差水心鐫嵐侵苔

一作達

摩髻日照狻猊絡仰首乍眩

旋迴眸更輝燿簷端凝

去

飛羽磴外浮碧落到迴解風

襟臨幽濯雲屬塵機性非便靜境心所著自取海鷗知

何煩尸祝酢峯圍震澤岸翠浪舞綃幕歛灩豈堯遭岐

嶂非禹鑿潛聽鐘梵處別有松桂壑靄重燈不光泉寒

網猶薄僅能躡孤刹烏慣親撻鐸服道身可遺乞閒心

已諾人間亦何事萬態相毒蠱戰壘競高深儒衣謾褒

博宣尼名位達未必春秋作管氏包霸圖須人解其縛  
伊余採樵者蓬藿方索漠近得風雅情聊將聖賢度多  
君富適采識度兩清恪詎寵生滅詞肯教夷夏錯未為  
堯舜用且向煙霞託我亦擺塵埃他年附鴻鶴

奉和公齋四詠次韻

小松

擢秀逋客巖遺根飛鳥逕因求飾清閔遂得辭危負貞  
同柏有心立若珠無脛枝形短未怪鬣數差難定

名山記云

松有兩鬣三鬣七鬣者言  
如馬鬣形也言粒者非

卷二  
況密三天風方遵四時柄那

興培塿歎免答鄰里病微霜靜可分片月疎堪映奇當  
虎頭筆韻叶通明性會拂陽烏冒掄材膺帝命

小桂

諷賦輕八植擅名方一枝才高不滿意更自寒山移宛  
宛別雲態蒼蒼出塵姿煙歸助華杪雪點迎芳蕤青條  
坐可結白日如奔螭諒無劉鶯翦憂即是蕭森時洛浦  
雖有蔭騷人聊自怡終為濟川楫豈在論高卑

新竹

別塢破苔蘚嚴城樹軒楹恭聞稟璇璣化質離青冥

璇璣竹

璣玉精受氣于玄軒之宿

色可定雞頸實堪招鳳領立窺五嶺秀坐

對三都屏晴月窈窕入曙煙霏微生昔者尚借宅況來  
處賓庭金罍縱傾倒碧露還鮮醒若非抱苦節何以偶  
惟馨徐觀穉龍出更賦錦苞零

鶴屏

時人重花屏獨即胎化狀叢毛練分彩疎節節相望

公八

相鶴經云大毛落叢毛生其色如雪又云高脚疎節則多跛也

曾無耗斲態頗得連軒

樣勢擬搶高尋身猶在函丈如憂雞鶩鬪似憶煙霞向  
塵世任縱橫霜襟自閒放空資明遠思不待浮丘相何  
由振玉衣一舉棲瀛閬

奉和因贈至一百四十言

孔聖鑄顏事垂之千載餘其間王道乖化作荆榛墟天  
必授賢哲為時攻翦除軻雄骨已朽百氏徒趨趨近者  
韓文公首為間闢鋤夫子又繼起陰霾終廓如搜得萬



古遺裁成十編書南山盛雲雨東序堆瓊琚偶此真籍  
客悠揚兩情攄清詞忽窈窕雅韻何虛徐唱既野芳圻  
訓還天籟疎輕波掠翡翠曉露披芙蕖儷曲信寡和未  
流難嗣初空持一竿餌有意獻鯨魚

奉和太湖詩二十首

初入太湖

東南具區雄天水合為一高帆大弓滿羿射爭箭疾時  
當暑雨後氣象仍鬱密不如開雕笈

音奴  
籠也

聳翅忽飛出

行將十洲近坐覺八極溢耳目駭鴻濛精神寒估栗坑

來斗呀豁涌處驚差岑嶮異

一作險若

拔龍湫喧如破蛟室

斯須風妥帖若受命平秩微茫識端倪遠嶠疑格

音閣筆

巉巉見銅闕

湖中穹崇山有銅闕

左右皆輔弼盤空儼相趨去勢

猶橫逸嘗聞咸池氣下注作清質至今涵赤霄尚且浴

白日

太湖上稟咸池五車之氣故一水五名也

又云構浮玉宛與崑閭匹肅

為靈官家此事難致詰

太湖乃仙家浮玉之北堂

纔迎沙嶼好指顧

俄已失山川互蔽虧魚鳥空顰

語彪反

恥

魚乙反

何當授真

檢得召天吳術一一問朝宗方應可譚悉

曉次神景宮

曉帆逗碕岸高步入神景灑灑襟袖清如臨藥珠屏雖  
然群動息此地常寂靜翠鑷有寒鏘碧花無定影馮軒  
羽人傲夾戶天獸猛稽首朝元君褰衣就虛省呀空雪  
牙利嗽水石齒冷香母未垂嬰芝田不論頃遙通河漢  
口近撫松桂頂飯薦七白蔬杯醺九光杏人間附塵躅  
固陋真鉗頸肯信扑鰲傾猶疑夏蟲永玄津蕩瓊龍紫

永啼金鼎盡出冰霜書期君一披省

入林屋洞

知名十小天林屋當第九

人間三十六洞天知名者十爾餘二十六天出九微志未

行於世題之為左神理之以天后

林屋洞為左神幽虛之天即天后真君之便闕

魁堆

一作

辟邪輩左右專備守自非方瞳人不敢窺洞

口唯君好奇士復嘯忘情友致

一作

傘在風林低冠入

雲竇中深劇苔井傍坎纔藥臼石角忽支頤藤根時束  
肘初為大幽怖漸見微明誘屹若造靈封森如達仙藪

嘗聞白芝秀狀與琅花偶又坐紫泉光甘如酌天酒

白芝

紫泉皆此洞所出乃神仙之飲餌非常人所能得

何人能挹嚼餌以代漿糗却

笑探五符徒勞步雙斗真君不可見焚盥空遲久眷戀玉碣文行行但迴首

### 雨中遊包山精舍

包山信神仙主者上真職及棲鐘梵侶又是清涼域乃知煙霞地絕俗無不得巖開一逕分柏擁深殿黑僧閒若圖畫像古非雕刻海客施明珠湘蕤料平淨食有魚

皆玉尾有烏盡金臆手攜鞞鐸佉

唐言  
楊枝

若在中印國千

峯殘雨過萬籟清且極此時空寂心可以遺智識知君

戰未勝尚倚功名力却下聽經徒

生公有  
聽經石

孤帆有行色

毛公壇

古有韓終道授之劉先生身如碧鳳皇羽翼披輕輕先生盛驅役臣伏甲與丁勢可倒五嶽不唯鞭群靈飄飄駕翔螭白日朝太清空遺古壇在稠疊煙蘿屏遠懷步置夕列宿森然明四角鎮露獸三層羞羽嬰迴眸盼七

炁運足馳疎星象外真既感區中道俄成邇來向千祀  
雲嶠空崢嶸石上橘花落石根瑤草青時時白鹿下此  
外無人行我訪岑寂境自言齋戒精如今君安死  
字君安  
魂魄猶羶腥有笈皆綠字有芝皆紫莖相將望瀛島浩  
蕩凌滄溟

三宿神景宮

靈蹤未徧尋不覺谿色暝迴頭問棲所稍下杉蘿逕巖  
居更幽絕澗戶相隱映過此即神宮虛堂愜雲性四軒

盡疎達一榻何清零

去

髣髴聞玉笙敲鏗動涼磬風凝

古松粒露壓脩荷柄萬籟既無聲澄明但心聽希微辨  
真語若授虛皇命尺宅按來平華池漱餘淨頻窺宿羽  
麗三吸晨霞盛豈獨冷衣襟便堪遺造請徒深物外趣  
未脫塵中病舉首謝靈峯徜徉事歸榜

以毛公泉獻大諫清河公

先生鍊飛精羽化成翩翻荒壇與古甃隱軫清冷存四  
面蹙山骨中心含月魂除非紫水脈即是金沙源香實



灑桂藥甘惟漬雲根向來探幽人酌罷祛蒙昏況公珪  
璋質近處諫諍垣又聞虛靜姿早挂冰雪痕君對瑤華  
味重獻蘭薰言當應滌煩暑朗詠暈飛軒我顧得一掬  
攀天叫重閭霏霏散為雨用以移焦原

縹緲峯

左右皆跳岑孤峯挺然起因思縹緲稱乃在虛無裏清  
晨躋磴道便是孱顏

一作  
頑

始據石即更歌遇泉還徙倚

花奇忽如薦樹曲渾成几樂靜煙靄知忘機猿狖喜頻

攀峻過斗末造平如砥舉首闕青冥迴眸聊下眎高帆

大於鳥廣墀

徒旦反

纔類蟻就此微茫中爭先未嘗已葛

洪話剛氣去地四千里苟能乘之遊止若道路耳吾將  
自峯頂便可朝帝宸盡欲活群生不唯私一已超騎明  
月蜍復弄華星藥却下蓬萊巔重窺清淺水身為大塊  
客自號天隨子他日向華陽敲雲問名氏

桃花塢

行行問絕境貴與名相親空經桃花塢不見秦時人願

此為東風吹起枝上春願此作流水潛浮藥中塵願此  
為好鳥得棲花際隣願此作幽蝶得隨花下賓朝為照  
花日暮作涵花津試為探花士作此偷桃臣桃源不我  
棄庶可全天真

明月灣

昔聞明月觀

在建業故臺城

祇傷荒野基今逢明月灣不值三

五時擇此二明月洞庭最看奇連山忽中斷遠樹分毫  
釐周迴二十里一片澄風漪見說秋半夜淨無雲物欺

兼之星斗藏獨有神仙期初聞鏘鐃跳

姚音

積漸調參差

空中卓羽衛波上停龍螭蹤舞玉煙節高歌碧霜詞清  
光消不動萬象寒咿咿此會非俗致無由得旁窺但當  
乘扁舟酒甕仍相隨或徹三弄笛或成數聯詩自然瑩  
心骨何用神仙為

練瀆

一云吳王  
開以練兵

越恃君子衆大將壓全吳

越有私卒君  
子六千人

吳將派天澤以

練舟師徒一鏡止千里支流忽然迂蒼奩東洪波坐似

馮夷驅戰艦百萬輩浮宮三十餘平川盛丁寧絕島分  
儲胥鳳押半鶴膝錦杠雜肥胡香煙與殺氣浩浩隨風  
驅彈射盡高鳥杯觥醉潛魚山靈恐見鞭水府愁為墟  
兵利德日削反為讎國屠至今鉤鏃殘尚與泥沙俱照  
此月倍苦來茲煙亦孤丁魂尚有淚合灑青楓枯

投龍潭

名山潭洞中自古多祕邃君將接神物聊用申祀事  
銘金象牙角尺木無不備亦既奉真官因之徇前志持來

卷二  
展明誥敬以投嘉瑞鱗光煥水容目色燒山翠吾皇病  
秦漢豈獨探怪異所貴風雨時民皆受其賜良田為巨  
浸污澤成赤地掌職一不行精靈又何寄唯貪血食飽  
但據驪珠睡何必費黃金年年授星使

孤園寺

浮屠從西來事者極梁武巖幽與水曲結構無遺土窮  
山林幹盡竭海珠璣聚況即侍從臣敢愛煙波塢幡條  
玉龍扣殿角金虬舞釋子厭樓臺生人露風雨今來四

百載像設藏雲浦輕鴿亂馴鷗鳴鐘和朝臚庭蕉裂旗  
旆野蔓差纓組石上解空人窓前聽經虎林虛葉如織  
水淨沙堪數徧問得中天歸修釋迦譜

上真觀

嘗聞昇三清真有上中下官居乘佩服一一自相亞霄  
裙或霞粲侍女忽玉姁坐進金碧腴去馳飈歛駕今來  
上真觀恍若心靈訝祗恐暫神遊又疑新羽化風餘撼  
朱草雲破生瑤榭望極覺波平行虛信煙藉閒開飛龜

帙靜倚宿鳳架俗狀既能遺塵冠聊以卸人間方大火  
此境無朱夏松蓋蔭日車泉紳拖天罅窮幽不知倦復  
息芝園舍鏘珮引涼姿焚香禮遙夜無情走聲利有志  
依閒暇何處好迎僧希將石樓借

消夏灣

霞島焰難泊雲峯奇未收蕭條千里灣獨自清如秋古  
岸過新雨高蘿蔭橫流遙風吹蒹葭折處鳴颼颼昔予  
守圭竇過于回祿囚日為籊籊徒

渠曲二音  
簞之異名

分作祗裯



雉

祇刁二音  
並單衣

願狎寒水怪不封朱轂侯豈知煙浪涯坐

可思重裘健若數尺鯉泛然雙白鷗不識號火井孰問  
名焦丘我真魚鳥家盡室營扁舟遺名復避世消夏還  
消憂

包山祠

靜境林麓好古祠煙靄濃自非通靈才敢陟群仙峯百  
里波浪沓中堂簫鼓重真君具瓊輦髮髻來相從清露  
濯巢鳥陰雲生晝龍風飄橘柚香日動播蓋容將命禮

且潔所祈年不凶終當以疏聞特用諸侯封

聖姑廟

渺渺洞庭水盈盈芳嶼神因知古佳麗不獨湘夫人流  
蘇蕩遙吹斜領生輕塵蜀綵駁霞碎吳綃盤霧勻可憐  
飛鷺姿合是乘鸞賓坐想煙雨夕兼知花草春空登油  
壁車窈窕誰相親好贈玉條脫堪攜紫綸巾殷勤撥香  
池重薦汀洲蘋明朝動蘭櫂不翅星河津

太湖石

他山豈無石厥狀皆可薦端然遇良工坐使天質變或  
裁基棟宇礪砢成廣殿或剖出溫瑜精光具華瑱或將  
破仇敵百礮資苦戰或用鏡功名萬古如會面今之洞  
庭者一以非此選槎牙真不材反作天下彥所竒者嵌  
崆所尚者蔥蒨旁穿參洞穴內竅均環釧刻削九琳窓  
玲瓏五明扇新雕碧霞段旋剖秋天片無力置池塘臨  
風只流眇

崦裏

山橫路若絕轉櫟逢平川川中水木幽高下兼良田溝  
塍墮微溜桑柘舍疎煙處處倚蠶箔家家下漁釜駢犢  
卧新菰野禽爭折蓮試招搔首翁共語殘陽邊今來九  
州內未得皆恬然賊陣始吉語狂波又凶年吾翁欲何  
道守此常安眠笑我掉頭去蘆中聞刺船余知隱地術  
可以齊真仙終當從之游庶復全於天

石板

一片倒山屏何時隳洞門屹然空闊中萬古波濤痕我

意上帝命持來壓泉源恐為庚辰官囚怪力所掀又疑  
廣袤次零落潛驚奔不然遭霹靂強半沈無垠如何造  
化首便截秋雲根往事不足問竒蹤安可論吾今病煩  
暑據簟常昏昏欲從石公乞  
石板在石  
公山前瑩理平如瑤前  
後植桂檜東西置琴樽盡攜天壤徒浩唱羲皇言

甫里集卷二

欽定四庫全書薈要卷一萬四千七十八

集部

甫里集卷三

唐 陸龜蒙 撰

五言古詩

和古杉三十韻

衆木盡相遺孤杉獨任奇  
挿天形磈兀當殿勢敝危  
恐是夸娥怒教臨巖薛衰  
節穿開耳目根癭坐熊羆  
世只論榮落人誰問等衰

初危切

有巔從日上無葉與秋欺  
虎

搏應難動鵬蹲不敢遲戰鋒新缺齧燒岸黑黹鬩死

龍骸雜爭奔鹿角差肢銷洪水腦稜聳梵天眉磔索珊

瑚湧森嚴獬豸窺向空分犖指衝浪出鯨鬐楊僕船撞

在蚩尤陣轟隕下連金粟固高用鐵菱披挺若苻堅極

浮于祖納椎崢嶸驚露鶴趑趣閎雲螭傍宇將支壓撐

霄欲抵戲背交蟲臂掎相向鵲拳追格

音各

筆差

初加反

猶

立階千卓未麾鬼神應暗晝風雨恐潛移已覺寒松伏

偏宜后土疲好邀清嘯傲堪映古茅茨材大應容蜎年



深必孕蘗後凋依佛氏初植必僧彌

寺即東晉王家別墅僧彌王珉小字

擁腫煩莊辯槎牙費庾詞詠多靈府困搜苦化權卑類  
既區中寡朋當物外推蟠桃標日域珠草侍仙墀真宰  
誠求夢春工幸可醫若能噓嶰竹猶足動華滋

### 和新秋三十韻

身閒唯愛靜籬外是荒郊地僻憐同巷庭喧厭累巢岸  
聲搖舴艋窓影辨蠨蛸逕祗溪禽下關唯野客敲竹岡  
從古凸池緣本來顚早藕擎霜節涼花束紫梢漁情隨

錘網獵興起鳴髀好夢經年說名方著處抄木疎唯自  
補枝癢欲誰抓牕靜常懸蕪鞭閒不正鞘山衣輕斧藻  
天籟逸弦匏蕙展風前帶桃烘雨後膠蘚乾粘晚砌煙  
濕動農庖沈約便圖籍揚雄重酒肴目曾窺絕洞耳不  
犯征鐃歷外窮飛朔著中記伏爻石林空寂歷雲肆肯  
哢譌松桂何妨蠹龜龍亦任嘲未能丹作髓誰相紫為  
胞莫把榮枯異但平和大小包由弓猿不捷梁園虎忘  
虢舊友懷三益關山阻二嶠道隨書麓古時共釣輪拋

好作忘機士須為莫逆交看君馳諫草憐我卧衡茅出  
處雖冥默薰蕕肯溷穀岸沙從鶴印崖蜜勸人揀白苗  
盈枯枿黃精綠滿苜仙因隱居信禪是淨名教勿謂江  
湖水終浮一大泡

奉和江南書情二十韻寄秘閣韋校書貽之商洛  
宋先輩垂文二同年次韻

我志如魚樂君詞稱鳳銜暫來從露冕何事買雲巖水  
石應容病松篁未聽讒鐘香杉蠹膩山信藥苗緘愛鷺

三  
敲危立思猿矍鑠  
謝才偏許朧  
阮放最憐咸  
大樂寧

忘缶竒工肯顧城  
客愁迷舊隱  
鷹健想秋鳧  
硯缺猶慵  
琢文繁却要  
芟雨餘幽沼  
淨霞散遠峯  
巉洗筆煙成  
段  
培花土作枕  
訪僧還覓伴  
醫鶴自須監  
荒廟猶懷季  
清  
灘幾夢嚴背  
風開蠹簡衝  
浪試新帆  
悶憶年支酒  
閒栽  
古樣衫  
釣家隨野舫  
仙蘊逐雕函  
度歲賒羸馬  
先春買  
小蟻共疏泉  
入竹同坐月  
過杉染翰窮  
高致懷賢發  
至  
誠不堪潘子  
鬢愁促易髟  
髟

和憶洞庭觀步十韻次韻

聞君遊靜境雅具更縱縱竹傘遮雲逕藤鞋踏蘚缸杖  
斑花不一樽大癭成雙水鳥行沙嶼山僧禮石幢已甘  
三秀味誰念百牢腔遠棹投何處殘陽到幾牕仙謠珠  
樹曲村餉白醅缸地里方吳會人風似冉厖探幽非遜  
世尋勝肯迷邦為讀江南傳何賢過二龐

和諫議罷郡叙懷六韻

已報東吳政初捐左契歸天應酬苦節人不犯寒威江

上思重借朝端望載飢紫泥封夜詔金殿賜春衣對酒  
情何遠裁詩思極微待升鎔造日江海問漁扉

雜諷九首

紅蠶緣枯桑青繭大如甕人爭捩

力結力計二切

其臂羿矢亦

不中微微待賢祿一一希入夢縱操上古言口噤難即

貢蛟龍在怒水拔取牙角弄丹穴如可游家家畜孤鳳

凶門尚兒戲戰血波瀾溶社鬼苟有靈誰能遏秋慟

童麋來觸犀德力不相及伊無愜心事祇有碎首泣況

將鵬蟲校數又百與十攻如餓鴟叫勢若脫兔急斯為  
朽關鍵怒犖抉以八年來橫干戈未見拔城邑得非佐  
饗者齒齒待啜汁羈維豪傑輩四駭方少繫此皆乘時  
利縱舍在呼吸吾欲斧其吭無雷動幽壑

鵑鵠慘于冰陸立懷所適斯人道仍悶不得不鳴呃當  
時布衣士亦作天子客至今東方生滿口自誇白終為  
萬乘交談笑無所隔致君非有書乃是堯舜畫祗今侯  
門峻日掃貧賤迹朝趨九韶音暮列五鼎食如聞恭儉

語謇謇事夕惕可拍伊牧肩功名被金石

赤舌可燒城讒邪易為伍詩人病之甚敢俾投豺虎長  
風吹竅木始有音韻吐無木亦無風笙簧由喜怒女媧  
鍊五石天缺猶可補當其利口銜罅漏不復數元精遺  
萬類雙目如牖戶非是既相參重瞳亦為瞽

東南有狂兇獵者西北矢利塵日冥冥獨此清夜止無  
人語其事偶坐窺天紀安得東壁明洪洪用墳史搜陽  
好古士一以罄雲水流堪灑菁英風足去稗秕如能出



奇計坐可平賊壘徐陳義皇道高駕太平軌攬疏成特  
雄濯垢為具美貢賢當上賞景福視所履永播南薰音  
垂之萬年耳

有藥何青青空城雪霜裏千林盡枯槁苦節獨不死他  
遭匠石顧摠入犧黃美遂得保天年私心未為恥高徒  
宿梟怪下亦容螻蟻大厦若掄材亭亭託君子

左右佩劍者彼此亦相笑趨時與閉門喧寂不同調潛  
機取聲利自許臻乎妙志士以神窺慚寂真可弔天之

發遐籟大小隨萬竅魁其鑪冶姿形質惟所召  
鼗笙磬  
竽瑟是以登清廟伊聖不吾欺誰能守蓬藿

橫笛鳴秋風清商入疏越君居不夜城肯怨孤戍月吳

兵甚犀利太白光突兀日已費千金匱

一作僅

聞侵一撥

豈無惡年少縱酒遊俠窟募為敢死軍去以梟叛卒豈  
無中林士貫穿學問骨兵法五十家浩蕩如溟渤高懸  
鹿皮睡清潤時依樾分已諾煙霞全遺事干謁既非格  
猛獸未可輕華髮北面師其謀幾能止征伐何妨秦董

勇又有曹嶺說堯舜尚詢芻公平聽無忽

朝為壯士歌暮為壯士歌壯士心獨苦傍人謂之何古  
鐵久不快倚天無處磨將來易水上猶足生寒波捷可  
搏飛狖健能超索馳群兒被堅利索手安馮河驚飈掃  
長林直木謝植科嚴霜凍大澤僵龍不如蛇昔者天血  
碧吾徒安歎嗟

美人

美人抱瑤瑟哀怨彈別鶴雌雄南北飛一旦異栖託諒

非金石性安得宛如昨生為並蒂花亦有先後落秋林  
對斜日光景自相薄猶欲悟君心朝朝佩蘭若

感事

將軍被鮫函祗畏金矢鏃豈知讒箭利一中成赤族古  
來信簧舌巧韻淒鏘曲君聞悅耳音盡日聽不足初因  
起毫髮漸可離骨肉所以達賢心求人須任目

素絲

園客麗獨繭詩人吟五綬如何墨子淚反以悲途窮我

意豈如是願參天地功為綫補君衮為絃繫君桐左右  
修闕職宮商還古風端然潔白心可與神明通

次幽獨君韻

落日送萬古秋聲含七哀枯株不蕭瑟枝幹虛崔嵬伊  
昔臨大道歌鍾醉高臺高臺今已平祇有春風迴明月  
白草死積陰荒壠摧聖賢亦如此慟絕真悠哉

贈遠

茱萸匣中鏡欲照心還懶本是細腰人別來羅帶緩從

君出門後不奏雲和管  
妾思冷如簀時時望君  
暖心期  
夢中見路永魂夢短  
怨坐泣西風秋牕月華滿

江野言懷

病身兼稚子田舍劣相容  
跡共公卿絕貧須稼穡供  
月方行到閨霜始近來濃  
樹少棲禽雜村孤守犬重汀洲  
藏晚弋籬落露寒春野并  
歌還整家書拆又封杉篁宜  
夕照牕戶憶疎鐘南北唯聞戰  
縱橫未勝農大春雖苦  
學叔夜本多慵直使貂裘弊  
猶堪過一冬

自和

命既時相背才非世所容著書糧易絕多病藥難供夢  
為懷山數愁因忌酒濃鳥媒呈不一魚寨下仍重晚桁  
簑兼褐晴簷織帶春著籤分水味標石認田封此地家  
三戶何人祿萬鍾草堂聊當貴金穴任輕農把釣竿初  
冷題詩筆未慵莫憂寒事晚江上少嚴冬

村夜二首

江上冬日短徘徊草堂暝鴻當絕塞來客向孤村病縣

縣起歸念咽咽興微詠菊徑月方高橘齋霜已併盤飡

蔬粟粗史籍籤牌盛目冷松桂間耳喧兒女競開瓶浮

蟻綠試筆秋毫勁畫戶亦重關寒屏遞相映詩從騷雅

得字費鉛黃正遇敵舞虵矛逢談捉犀柄無名升甲乙

有志扶荀孟守道希昔賢為文通古聖幽憂廢長劍顛

顛慙清鏡祇會魚鳥情詎知時俗性浮虛多徇勢老懶

徒歷聘既不務人知空餘樂天命如何在田野家事苦

遼賁耕稼一以微困倉自然罄愁襟風葉亂獨坐燈花



迸明發成浩歌誰能少傾聽

世既賤文章歸來事耕稼伊人著農道

亢倉子有農道篇

我亦

賦田舍所悲勞者苦敢用辭為詫祗效芻牧言誰防輕

薄罵嘻今居寵祿各自矜雄霸堂上考華鐘門前竚高

駕纖洪動絲竹水陸供鱸炙小雨靜樓臺微風動蘭麝

吹噓川可倒盼睐花爭姹萬戶膏血窮一筵歌舞價安

知勤播植卒歲無閒暇種以春鴈

音扈

初穫從秋隼下專

專望種榘滑滑條桑柘日晏腹未充霜繁體猶裸平生

守仁義所疾唯狙詐上誦周孔書沈湎至酣藉豈無致

君術堯舜馳

一作不

上下豈無活國方頗牧齊教化蛟龍

任乾死雲雨終不借羿臂束如囚徒勞誇善射才能誚  
箕斗辯可移嵩華若與忙輩量飢寒殆相亞長吟倚清  
瑟孤憤生遙夜自古有遺賢吾容偏稱謝

紀事

蜀本作二首

本作漁釣徒心將遂疎放苦為飢寒累未得恣閒暢去  
年十二月身住雲溪上病裏賀豐登雞豚聊饋餉巍峩

卞山雪凝冽不可向瘦骨倍加寒徒為厚繒纈晴來露  
青霽千仞缺尋丈卧恐玉華銷時時推枕望雖然榮衛  
困亦覺精神王把筆強題詩粗言瓌怪狀吳興鄭太守  
文律頗清壯鳳尾與鯨牙紛披落新唱緘書寄城內唐  
突無以況料峭採蓮船縱橫簸天浪方傾謝公詠忽值

莊生喪

鄭員外仁規是年受代俄喪偶

默默阻徽音臨風但惆悵春歸

殆秋未固自嬰微恙歲晏

一作早

弗躬親何由免欺誑今

來觀刈穫乃在松江並

步浪切

門外兩潮過波瀾光蕩漾

都緣新卜築是事皆草創爾後如有年還應愜微

一作收

尚天高氣候爽野迴襟懷曠感物動牢愁憤時頻翫

口浪

切

麟

子朗切

平生樂篇翰至老安敢忘駿骨正牽鹽玄文

終覆醬嗟今多赤舌見善唯蔽謗忖度大為防涵容寬

作量圖書筐簾外闢眼皆賸長餓隸亦勝無薄田家所

仰稍離飢寒患學古真可強聖道庶經營世途多踉蹌

近聞天子詔復許私醞釀趨

促

使奉酒材呼兒具盆盎

宵長擁吟褐日晏開書幌我醉卿可還陶然似元亮

孤鴈

我生天地間，獨作南賓鴈。  
哀鳴慕前侶，不免飲啄晏。  
雖蒙小雅詠，未脫魚網患。  
矧是婚禮須，憂為弋者篡。  
晴鳶爭上下，意氣苦淩慢。  
吾常嚇鴛鴦，雛爾輩何足。  
訕迴頭語，晴鳶汝食腐。  
鼠慣無異鴛，駘群戀短豆。  
阜棧豈知瀟湘岸，葭蕕蘋萍間。  
有石形狀奇，寒流古來灣。  
閒看麋鹿志，了不愛芻豢。  
世所重巾冠，何妨野夫巾。  
騷人誇蕙芷，易象取陸莧。  
漆園逍遙篇中，亦載尺鷃。  
汝惟才性下嗜，好

不可諫身雖慕高翔糞壤長流盼或聞通鬼魅怪崇立

可辨砮族書尚存寧容恣妖幻

砮族周禮秋官司寇下  
砮族氏掌覆天鳥之巢

砮鄭司農讀為撻又他歷反

族讀為爵族之族謂巢也

南涇漁父

一作南溪

予方任疎慵地僻即所好江流背村落偶往心已繆

力報

切

田家相去遠岑寂且縱傲出戶手先筇見人頭未帽

南涇有漁父往往攜稚造問其所以漁對我真蹈道吾

初簪魚鼈童仆至于耄窟穴與生成自然通壺與孜孜

戒吾屬天物不可暴大小參去留候其孳養報終朝獲  
漁利魚亦未嘗耗同覆天地中違仁辜覆燾余觀為政  
者此意諒難到民皆死搜求莫肯與愍悼今年川澤旱  
前歲山源潦牒訴已盈庭聞之類禽噪譬如豢雞鶩豈  
不容乳抱孟子譏宋人非其摠苗躁吾嘉漁父旨雅叶  
賢哲操儻遇採詩官斯文誠敢告

引泉

睦州龍興觀  
老君院作

上嗣位六載吾宗刺桐川余來拜旌戟詔下之明年是

時春三月繞郭花蟬聯嵐盤百萬髻上插黃金鈿授以  
道士館置榻于東偏滿院聲碧樹空堂形老仙本性樂  
凝澹及來更虛玄焚香禮真像盥手披靈編新定山角  
角烏龍獨巉然除非淨晴日不見蒼崖巔上有挈雲峰  
下有噴壑泉泉分數十汊落處皆崢嶸潺湲寒聲入爛醉聒  
破西牕眠支筇起獨尋祇在牆東邊呼童具畚鍤立鑿  
莓苔穿濛濛一派墮練帶橫斜牽亂石拋落落寒流響  
濺濺狂奴七里瀨縮到疎楹前跳花潑半散涌沫飛旋



圓勢束三峽掛瀉危孤磴懸曾聞瑤池溜亦灌朱艸田  
鳬伯弄翠藻鸞雛舞丹煙淩風捩桂旄隔霞馳犀船沉  
當玄元家嘗著道德篇上善可比水斯文參五千精靈  
若在此肯惡微波傳不擬爭滴瀝還應會淪漣出門後  
一作復飛箭合勢浮青天必有學真子鹿冠秋鶴顏如能  
輔余志日使疏其源

秋日遣懷十六韻寄道侶

盡日臨風坐雄詞妙畧兼共知時世薄寧恨歲華淹且

把靈方試休憑吉夢占夜燃燒汞火朝鍊洗金鹽有路  
求真隱無媒舉孝廉自然成嘯傲不是學沈潛水恨同  
心隔霜愁兩鬢霑鶴屏憐掩扇烏帽愛垂簷雅調宜觀  
樂清才稱典籤冠敝玄髮少書健紫毫尖故疾因秋召  
塵容畏日黔壯圖須行行儒服謾襜褕片石聊當枕橫  
煙欲代簾蠹根延穴蟻疎葉漏庭蟾藥鼎高低鑄雲庵  
早晚苦胡麻如重寄從謂我無厭

甫里集卷三

謹案卷一第五頁前四行誰輕如舉毛按全唐詩  
舉作鴻


第十頁前六行賊卓亂王室刊本卓訛莽按上文  
石刻五經置于太學係東漢熹平四年莽亂漢  
去此已遠且下云洛陽煨燼明係董卓事今改  
卷二第六頁前七行飯薦七白疏刊本七訛亡據  
全唐詩改

第九頁後五行超騎明月蝓刊本蝓訛餘據全唐

詩改

卷三第十二頁後八行吾初籍魚鼈刊本籍訛籍

據周禮改



總校官庶吉士臣張能照

校對官編修臣楊壽楠

謄錄監生臣鄒貽詩

欽定四庫全書薈要

集部  
甫里集卷八  
四至

詳校官助教<sub>臣</sub>常循



欽定四庫全書薈要卷一萬四千七十九

集部

甫里集卷四

唐 陸龜蒙 撰

五言古詩

紀夢游甘露寺

寺在京口  
北園山上

昔卧高高雲雲窓正寒夕披裘忽生夢似到空王宅  
我天一峯立欄楯橫半壁級倚綠巔差關臨赤霄闕  
捫虛陟孤峭不翅千餘尺疊掌望衆恩分明袒肩釋  
凌香稽

首罷嘹嘒

缺

高戶承北風聲號太波白光中目難

送定驗方可覲樹細鴻濛烟島疎零落碧須臾群籟入

空水相噴激積浪亞寒堆呀如鬪危石跳音簇鞞鼓濺

沫交矛戟鳥疾帆亦奔紛紛助勑敵思非水靈怒即是

飢龍擘怯懾不敢前荷襟汗霑霑迴經定僧處泉木光

相射巖崕雲族栖松柯露華滴逍遙得真趣邈迤尋常

跡山腹貯孤亭嵐根四垂帟誰題雪月句乃是曹劉格

愛樹亭有故  
太尉房公詩

間闕一枝瓊邊樓數聲笛吟高矍然起若



自蒼旻擲短燭墮餘花圓蟾掛斜魄自從神錫境無處不登陟  
忽上南徐山心期豁而獲豈伊煩惱骨合到清涼域暗得蝴蝶  
身幽奇盡相識奈何有名氏未列金閨籍翻慙非頂童得奉真  
如策雲濤觸風望毫管和煙搦聊紀夢中遊留之間禪客

五言排律

京口與友生話別

共是悲秋客相逢恨不堪鴈頻辭薊北人尚在江南名  
利機初發樵漁事先諳松門穿戴寺荷徑繞秦潭

秦潭  
始皇

所開繩檢真難束疎慵却易耽枕當高樹穩茶試遠泉甘

架上經唯一樽前雅祇三風雲勞夢想天地入醺酣歷  
自堯階數書因禹穴探御龍雖世祿下馬亦清譚國計  
徒盈策家儲不滿甌斷簾從燕出啟弁倩人簪木墜涼  
來葉山橫霽後嵐竹牕深窸窣苔洞綠龕弇積行依顏  
子和光則老聃杖誠為虎節披信作鮫函養鷺看窺沼  
尋僧助結庵功名思馬援歌唱咽羊曇乞食羞孤鳳無  
衣羨八蠶繫帆留宿客吟句任羸驂寵鶴空無衛占烏

未見鄣香還須是桂青會出於藍蜀酒時傾甌

瀟黃反  
從蜀呼

吳鰕徧發柑

苦甘反

玉封千挺藕霜閉一筒柑惜珮終邀

禍辭環好激貪宗溟雖眀澮成厦必梗枻碧石雕琴薦  
黃金飾劒鐔煙緣沙砌引水為藥畦擔博物君能繼多  
才我尚慙別離猶得在秋鬢未髮髮

丹陽道中寄友生

煙樹綠微微春流浸竹扉短簑攜稚去孤艇載魚歸海  
俗蘆編室村娃練束衣舊栽奴橘老新刈女桑肥錦鯉

衝風擲絲禽掠浪飛短亭幽徑入陳廟數峰圍地廢金  
牛暗陵荒石獸稀思君同一望帆上怨餘暉

寄茅山何道士

終身持玉舄丹訣未應傳況是曾同宿相違便隔年問  
顏知更少聽話想踰玄古錄文垂露新金永絕烟蜂供  
和餌蜜人寄買溪錢紫燕長巢硎青龜忽上蓮篋藏微  
隱詔囊佩攝生篇圃暖芝臺秀巖春乳管圓池栖子孫  
鶴堂宿弟兄仙幸閱靈書次心期賜一編

江南秋懷寄華陽山人

櫛髮涼天曙含毫故國情  
歸心一夜極病體九秋輕  
忽起檐楸詠因悲絡緯鳴  
逢山即堪隱何路可圖榮  
揲策空占命持竿不釣名  
忘憂如有待縱嬾似無營  
小徑纔分草斜扉劣辨荆  
冷荷承露酌疎菊卧烟莖  
譜為聽琴閱圖緣看海  
澄鷺毛浮島白魚尾撇波  
頰庭橘低攀嗅園葵旋折  
烹餓鳥窺食案鬪鼠落書  
棚種豆悲楊惲投爪憶衛  
旂東林誰處士南郭自先  
生分野星多蹇連山

卦少亨衣裾徒博大文籍漫縱橫蘭葉騷人珮萼絲內  
史羹鵠冠難適越羊酪未饒僖倚嘯微抽恨論玄好析  
醒栖遲勞鼓篋豪俠愛金羸鍊藥傳丹鼎嘗茶試石甌  
泊連枯葦暗牕對脫梧明未達譏張翰非才嫉禰衡遠  
懷魂易黯幽憤骨堪驚礪缺知矛利磨瑕見璧瑛道源  
疏滴瀝儒肆售精誠敢歎良時擲猶勝亂世櫻相秦猶  
幾死王漢尚當黥飲啄期應定窮通勢莫爭髡為皂  
隸譚笑得公卿浴日安知量追風不計程塵埃張耳分

肝膽季心傾諭蜀專操檄通甌獨請纓匹夫能曲踊萬  
騎可橫行許國輕妻子防邊重戰耕俄分上尊酒驟厭  
五侯鯖靜默供三語從容等一枰弘深司馬法雄傑貳  
師兵朔雪埋烽燧寒笳裂旆旌乘時收句注即日掃攬  
槍武昔威殊俗文今被八紘琮璜陳始畢韶夏教初成  
芽孽群妖滅松筠百度貞郎官青瑣拜使者繡衣迎帝  
道將雲闢澆波漸砥平學徒羞說霸佳士恥為跼負杖  
歌栖畝操觚賦北征才當曹斗怯書比惠車盈謝氏憐

兒女郝家貴舅甥唯荒稚珪宅莫贈景山鎗賢彥風流  
遠江湖思緒縈謳啞搖舫艫出沒漾鵲鵲晚樹參差碧  
奇峰邈迤晴水喧棹紫茭村響舂香杭荷笠漁翁古穿  
籬守犬獐公衫白紵卷田餉綠簪擎地與膏腴錯人多  
富壽井相懽時帖泰獨坐歲崢嶸唧噴蛩吟壁連軒鶴  
舞楹戍風飄疊鼓隣月動哀箏未得文章力何由俸祿  
清和鉛還搢搢持斧自丁丁驚懼疑凋朽功勤過屑瓊  
凝神披夕秀盡力取朝英蠹簡開塵篋寒燈立曉檠靜



翻詞客系閒難史官評天地寧舒慘山川自變更祇能

分跖惠誰解等殤彭項豈重瞳聖夔猶一足顰阮高酣

麴蘖莊達謝犧牲齟舌無勞話寬心豈可盛但從鑪冶

鍛莫受罣羅嬰硯撥萍根洗舟衝蓼穗撐短牀編翠竹

低几凭紅檉霜信催楊柳烟容裏杜衡桁排巢燕燕屏

畫醉猩猩嬾檜推嵐影飛泉撼玉琤艣舸尋遠近握槳

鬪輸贏技壓離披瓠簷垂礪磊橙忘情及宗柄抱疾過

劉楨野饋夸菰飯江商賈蔗餽送神枹瓦釜留客上瓷

觥舉檝揮青劍鳴榔扣遠鉦鳥行沈莽蒼魚隊破泓澄

手戟非吾事腰鎌且發硎

音坑

諒難求標標

上聲

聊欲取錚

錚幾歎蟲甘蓼還思鹿美苹愁長難自剪歌斷有誰賡

未去師黃石空能說白珩性湍休激浪言芳罷抽萌地

僻琴樽獨溪寒杖屨清物齊消臆對戈倒共心盟絲曳

靈妃瑟金涵太子笙幽棲膠竹塢仙慮驛蓬瀛想像珠

襦鳳追飛翠藥鶯霧簾深杳悄雲磬冷敲鐙錄字多階

品華陽足弟兄焚香凝一室盡日思曾城匿景崦岷色

呀空渤澥聲吾當營巨黍東去射長鯨

送宣武從事越中按獄

曉看呈使範知欲敕星軺水國難驅傳山城便倚橈  
秉籌先獨立持法稱高標旌旆臨危堞金絲發麗譙別愁  
當翠巘冤望隔風潮木落孤帆迴江寒疊鼓飄客鴻吳  
島盡殘雪剡汀消坐想休秦獄春應到柳條

七言排律

寄懷華陽道士

華陽門外五芝生  
飡罷愁君入杳冥  
遙夜獨栖還有夢  
昔年相見便忘形  
為分科斗親鉛槧  
與說蜉蝣坐竹櫺  
醺後幾時歸紫閣  
別來終日誦黃庭  
閒教辨藥僮名甲  
靜識窺巢鶴姓丁  
絕澗飲羊春水膩  
傍林燒石野煙腥  
深沈谷響含疎磬  
片段嵐光落畫屏  
休採古書探禹穴  
自刊新歷鬪堯羹  
珠宮鳳合迎蕭史  
玉籍人誰訪蔡經  
架上黑椽長褐穗  
案頭丹篆小符靈  
霓軒入洞齊初月  
羽節升壇拜七星  
當路獨行衝虎豹  
向風孤嘯起雷霆

凝神密室多生白  
叙事聯編盡殺青  
匝地山川皆暗寫  
隱天竿籟祗閒聽  
分張火力燒金竈  
拂拭苔痕洗酒餅  
翠壁上吟朝復暮  
暖雲邊卧醉還醒  
倚身長短裁筇杖  
倩客高低結草亭  
直用森嚴朝北帝  
愛將清淺問東溟  
常思近圃看栽杏  
擬借隣峯伴采苓  
揜樹半扉晴靄靄  
背琴殘燭曉熒熒  
舊來捫虱知王猛  
欲去為龍歎管寧  
蟾魄幾應臨蕙帳  
漁竿猶尚枕楓汀  
銜煙細草無端綠  
冒雨閒花作意馨  
掠岸驚波沈翡翠  
入簷斜照礙蜻蜓

初征漢棧宜飛檄待破燕山好勒銘六轡未收千里馬  
一囊空負九秋螢我悲雌伏真方枘他騁雄材似建瓴  
合在深崖齊散木自求滄海點流萍頻拋俗物心還爽  
遠憶幽期目剩瞑見買扁舟束真誥手披仙語任揚舲

甫里集卷四

欽定四庫全書薈要卷一萬四千八十

集部

甫里集卷五

唐 陸龜蒙 撰

五言律詩

螢

肖翹雖振羽戚促盡疑冰  
風助流還急烟遮點暫凝  
不須輕列宿纔可擬孤燈  
莫倚隋家事曾煩下詔徵

蟬

祇憑風作使全仰柳為都一腹清何甚雙翎薄更無伴  
貂金換酒并雀畫成圖恐是千年恨偏令落日呼

秋熱

自昔秋捐扇今來意未衰殷勤付柔握浙瀝待清吹午  
氣朱崖近宵聲白羽隨摠如南國候無復婕妤悲

村中晚望

抱杖柴門立江村日易斜鴈寒猶憶侶人病更離家短  
鬢看成雪雙眸舊有花何須萬里外即此是天涯



# 漁具

并序

天隨子戲于海山之顏有年矣矢漁之具莫不窮極

其趣大凡結繩持網者總謂之網罟網罟之流曰罾

曰罾曰翼

側交反

圓而縱捨曰罩挾而升降曰罟

女減反

緡而竿者總謂之筌筌之流曰筒曰車橫川曰梁承

虛曰筍編而沈之曰簞

音卑

矛而卓之曰𦏧

音冊矛也

棘而

中之曰叉鏃而綸之曰射扣而騃之曰糧

以薄板置瓦器上擊

之以驅魚置而守之曰神

鯉魚滿三百六十歲蛟龍輒率而飛去年置一神守之則不能

去矣神龍也

列竹于海濱曰漚

吳之漚瀆是也

錯薪于水中曰蓐

糝

所載之舟曰舳艫所貯之器曰簠簋其他或術以招之或藥而盡之皆出于詩書雜傳及今之聞見可考而驗之不誣也今擇其任詠者作十五題以諷噫矢魚之具也如此余既歌之矣矢民之具也如彼誰其嗣之鹿門子有高灑之才必為我同作

網

大罟網目繁空江波浪黑沈沈到波底恰共波同色牽

時萬鬢入已有千鈞力尚悔不橫流恐他人更得

罩

左手揭圓牋輕橈弄舟子不知潛鱗處但去籠烟水時

穿紫屏

一作薄

破忽值朱衣起

松江有朱衣鮒

貴得不貴名敢論

魴與鯉

呂

有意烹小鮮乘流駐孤棹雖然煩取捨未肯求津要多  
為蝦蜆誤已分鵠鵲笑寄語龍伯人荒唐不同調

釣筒

短短截筠光悠悠卧江色蓬差艣相應雨慢煙交織須  
臾中芳餌迅疾如飛翼彼竭我還浮君看不爭得

釣車

溪上持雙輪溪邊指茅屋間乘風水便敢議朱丹轂高  
多倚衡懼下有折軸速曷若載逍遙歸來卧雲族

魚梁

能編似雲薄橫絕青川口缺處欲隨波波中先置筍投

身入籠檻自古難飛走盡日水濱吟殷勤謝漁叟

叉魚

春溪正含綠良夜才參半持矛若羽輕列燭如星爛傷  
鱗跳密藻碎首沈遙岸盡族染東流傍人作佳翫

射魚

彎弓注碧潄掉尾行涼沚青楓下晚照正在澄明裏  
攄弦斷荷扇濺血殷菱藻若使禽荒聞移之暴煙水

鳴榔

水淺藻荇澁釣罩無所及鏗如木鐸音勢若金鉦急敲  
之就深處用以資俯拾搜羅爾甚微遁去將何入

滬

吳人今謂之滬

萬植禦洪波森然倒林薄千顱咽雲上過半隨潮落其  
間風信背更值雷聲惡天道亦哀多吾將移海若

簪

吳人今謂之簪

斬木置水中枝條互相蔽寒魚遂家此自以為生計春  
冰忽融冶盡取無遺裔所託成禍機臨川一凝睇

種魚

鑿池收頰鱗疎置雲嶼還同汗漫遊遂以江湖處如  
非一神守潛被蛟龍主蛟龍若無道跛鼈亦可禦

藥魚

香餌綴金鉤目中懸者幾盈川是毒流細大同時死不  
惟空飼犬便可將貽蟻苟負竭澤心其他盡如此

舩艫

蓬棹兩三事天然相與閒朝隨稚子去暮唱菱歌還倚

石遲後侶徐撓供遠山君看萬斛載沈溺須臾間

苓箬

誰謂苓箬小我謂苓箬大盛魚自足食寔壁能為害時  
將刷蘋浪又取懸藤帶不及腰上金何勞問蒼蔡

和添漁具五篇

漁庵

結茅次煙水用以資嘯傲豈謂釣家流忽同禪室號閒  
憑山叟占晚有溪禽嫪華屋莫相非各隨吾所好



釣磯

揀得白雲根  
秋潮未曾沒  
坡陀坐龜背  
散漫垂龍髮  
持竿從掩霧  
置酒復待月  
即此放神情  
何勞適吳越

蓑衣

山前度微雨  
不廢小澗魚  
上有青襪襖  
下有新踞踈  
滴瀝珠影泣  
離披嵐彩虛  
君看荷製者  
不得安吾廬

簞笠

朝攜下楓浦  
晚戴出烟艇  
冒雪或平簷  
聽泉時仄頂  
颺

移靄然色波亂危如影不識九衢塵終年居下洞

背蓬

敏手試江筠隨身織烟殼沙禽固不知釣伴猶初覺閒  
從翠微拂靜唱滄浪濯見說萬山潭漁童盡能學

樵人十詠

并序

環中先生謂天隨子曰子與鹿門子應和為漁具詩  
信盡其道而美矣世言樵漁者必聯其命稱且常與  
隱君子事詩之言錯薪禮之言負薪傳之言積薪史

之言吏薪非樵者之實乎不可足以寄興詠獨闕其  
詞耶退作十樵以補其闕漏寄鹿門子

樵谿

山高谿且深蒼蒼但群木抽條欲千尺衆亦疑樸櫟一  
朝蒙剪伐萬古辭林麓若遇燎玄穹微烟出雲族

樵家

草木黃落時比隣見相喜門當清澗盡屋在寒雲裏山  
棚日纔下野竈煙初起所謂順天民唐堯亦如此

樵叟

自小即胼胝至今凋鬢髮所圖山褐厚所愛山爐熱不  
知冠蓋好但信烟霞活富貴如疾顛吾從老巖穴

樵子

生在蒼崖邊能諳白雲養

去聲山家謂  
養柴地為養

纔穿遠林去已

在孤峰上新和野花束步帶山詞唱日暮不歸來柴扉  
有人望

樵逕

石脈青靄間行行自幽絕方愁山嫵嬈更值雲遮截爭  
推好林浪共約歸時節不似名利途相期覆車轍

樵斧

淬礪秋水清攜持遠山曙丁丁在前澗杳杳無尋處巢  
傾鳥猶在樹盡猿方去授鉞者何人吾今易其慮

樵檐

輕無斗儲價重則筋力絕欲下半巖時憂襟兩如結風  
高勢還却雪厚疑中折負荷誠獨難移之贈來哲

樵風

朝隨早潮去暮帶殘陽返向背得清飈相追無近遠採  
山一何遲服道常苦蹇仙術信能為年華未將晚

樵火

積雪抱松塢蠹根燃草堂深爐與遠燒此夜仍交光或  
似坐竒獸或如焚異香堪嗟宦遊子凍死道路傍

樵歌

縱調為野吟徐徐下雲磴因知負樵樂不減援琴興出

林方自轉隔水猶相應但取天壤情何求郢人稱

和酒中十詠

酒星

萬古醇酎氣結而成晶熒降為嵇阮徒動與樽壘并不  
獨祭天廟亦應邀客星何當八月槎載我遊青冥

酒泉

初懸碧崖口漸注青谿腹味既敵中山飲寧拘一斛春  
疑浸花骨暮若酣雲族此地得封侯終身持美祿

酒筭

山齋醞方熟野童編近成持來歡伯內坐使賢人清不  
待盎中滿旋供花下傾汪汪日可挹未羨黃金罍

酒牀

六尺樣何奇溪邊濯來潔槽深貯方半石重流還咽閒  
移秋病可偶聽寒夢缺往往枕眠時自疑陶靖節

酒壚

錦里多佳人當壚自沽酒高低過反坫大小隨圓甌數



錢紅燭下滌器春江口若得奉君歡十千求一斗

酒樓

百尺江上起東風吹酒香行人落帆上遠樹涵殘陽凝  
睇復凝睇一觴還一觴須知凭欄客不醉難為腸

酒旗

搖搖倚青岸遠蕩遊人思風歌翠竹杠雨澹香醪字纔  
來隔烟見已覺臨江遲大旆非不榮其如有王事

酒樽

黃金即為侈白石又太拙斲得奇樹根中如老蛟穴時  
招山下叟共酌林間月盡醉兩忘言誰能作天舌

酒城

何代驅生靈築之為釀地殊無甲兵守但有糟漿氣雉  
堞圯如狂女牆低似醉必若據而爭先登儀狄氏

酒鄉

誰知此中路暗出虛無際廣莫是隣封華胥為附麗三  
杯聞古樂伯雅逢遺裔自爾等榮枯何勞問玄弟



南里集卷五

欽定四庫全書會要卷一萬四千八十一

集部

甫里集卷六

唐 陸龜蒙 撰

五言律詩

添酒中六詠

并序

鹿門子示余酒中十詠物古而詞麗旨高而性真可謂窮天人之際矣余既和而且曰昔人之於酒有注為池而飲之者象為龍而吐之者親盜甕間而卧者

將寶舟中而浮者可為四荒矣徐景山有酒鎗嵇叔  
夜有酒杯皆傳于後代可謂二高矣四荒不得不刺  
二高不得不頌更作六章附于末云

酒池

萬斛輸曲沼千鐘未為多殘霞入醞齊遠岸澄白醪后  
土亦沈醉姦臣空浩歌邇來荒淫君尚得乘餘波

酒龍

銅雀羽儀麗金龍光彩奇潛傾鄴宮酒忽似商庭漿若

怒鱗甲赤如酣頭角垂君臣坐相滅安用驕奢為

酒甕

候煖麴蘖調覆深苦蓋淨溢處每淋漓沈來還漉漉嘗  
聞清涼耐可養希夷性盜飲以為名得非君子病

酒船

昔人性何誕欲載無窮酒波上任浮身風來即開口荒  
唐意難遂沈湎名不朽千古如比肩問君能繼否

酒鎗

景山實名士所翫垂清塵嘗作酒家語自言中聖人奇  
器質舍古挫糟味應醇唯懷魏公子即此飛觴頻

酒杯

叔夜傲天壤不將琴酒疎製為酒中物恐是琴之餘一  
弄廣陵散又裁絕交書頽然擲林下身世俱何如

和茶具十詠

茶塢

茗地曲隈回野行多繚繞向陽就中密背澗差還少遙



盤雲髻慢亂簇香篝小何處好幽期滿巖春露曉

茶人

天賦識靈草自然鍾野姿閒來北山下似與東風期雨

後探芳去雲間幽路危唯應報春鳥得共斯人知

顧清山有

報春鳥

茶筍

所孕和氣深時抽玉筍短輕煙漸結華嫩蘂初成管尋  
來青靄曙欲去紅雲暖秀色自難逢傾筐不曾滿

茶竈

金刀劈翠筠織似波紋斜製作自野老攜持伴山娃昨  
日鬪烟粒今朝貯綠華爭歌調笑曲日暮方還家

茶舍

旋取山上材架為山下屋門因水勢斜壁任巖隈曲朝  
隨鳥俱散暮與雲同宿不憚採掇勞祗憂官未足

茶竈

經云茶竈無突

無突抱輕嵐有煙映初旭盈鍋玉泉沸滿甌雲牙熟奇

香襲春桂嫩色淩秋菊煬者若吾徒年年看不足

茶焙

左右擣凝膏朝昏布煙縷方圓隨樣拍次第依層取山

謠縱高下火候還文武見說焙前人時時炙花脯

紫花焙人

以花  
為脯

茶鼎

新泉氣味良古鐵形狀醜那堪風雪夜更值煙霞友曾

過潁石下又住清溪口

潁石清溪皆江南出茶處

且共薦皋盧

茶名

何

勞傾斗酒

茶甌

昔人謝塤塤徒為妍詞飾

劉孝威集有謝塤塤啓

豈如珪璧姿又

有煙嵐色光參筠席上韻雅金壘側直使于闐君從來未嘗識

煮茶

閒來松間坐看煮松上雪時于浪花裏併下藍英未傾餘精爽健忽似氛埃滅不合別觀書但宜窺玉札

四明山詩

并序

謝遺塵者有道之士也嘗隱于四明之南雷一旦訪  
余來語不及世務且曰吾得于玉泉生知子性誕逸  
樂神仙中書探海嶽遺事以期方外之交雖銅牆鬼  
炊虎獄劍餌無不窺也

開

子語吾山之奇者有峰最高四穴在峰上每天地澄  
霽望之如牖戶相傳謂之石牕即四明之目也山中  
有雲不絕者二十里民皆家雲之南北每相從謂之

過雲有鹿亭有樊榭有潺湲洞木實有青櫺子味極  
甘而堅不可卒破有猿山家謂之鞠侯其他在圖籍  
不足道也凡此佳處各為我賦詩余因作九題題四  
十字謝省之曰玉泉生真不誣矣好事者為余傳之  
因呈襲美

石窻

石窻何處見萬仞倚晴虛積靄迷青瑱殘霞動綺疏山  
應列圓嶠宮便接方諸祇有三奔客時來教隱書

過雲

相訪一程雲雲深路僅分嘯臺隨日辯樵斧帶風聞曉  
著衣全濕寒衝酒不醺幾回歸思靜髮髯見蘇君

雲南

雲南更有溪丹礫盡無泥藥有巴賁賣枝多越鳥啼夜  
清先月午秋近少嵐迷若得山顏住芝筴手自攜

雲北

雲北是陽川人家洞壑連壇當星斗下樓撈翠微邊一

半遙風雨三條古井煙金庭如有路應到左神天

鹿亭

鹿亭巖下坐時領白麝過草細眠應久泉香飲自多認  
聲來月塢尋跡到烟蘿早晚吞金液騎將上絳河

樊榭

樊榭何年築人應白日飛至今山客說時駕玉麟歸乳  
蒂懸松嫩芝臺出石微憑欄虛目斷不見羽華衣

潺湲洞



石淺洞門深潺潺萬古音似吹雙羽管如奏落霞琴倒  
穴漂龍沫穿松濺鶴襟何人乘月弄應作上清吟

青櫺子

山實號青櫺環岡次第生外形堅綠殼中味敵瓊英墮  
石樵兒拾敲林宿鳥驚亦應仙吏守時取薦層城

鞠侯

何事鞠侯名先封在四明但為連臂飲不作斷腸聲野  
蔓垂纓細寒泉佩玉清滿林遊宦子誰為作君卿

和五貺詩

五瀉舟

樣自桐川得詞因隱地成好漁翁亦喜新白鳥還驚沙  
際擁江沫渡頭橫雨聲尚應嫌越相遺禍不遺名

華頂杖

萬古陰崖雪靈根不為枯瘦于霜鶴脰奇似黑龍鬚挂  
訪譚玄客持看潑墨圖湖雲如有路兼可到仙都

太湖硯

誰截小秋灘間窺四緒寬繞為千嶂遠深置一潭寒坐  
久雲應出詩成墨未乾不知新博物何處擬重刊

烏龍養和

養和名字好偏寄道情深所以親逋客兼能助五禽倚  
肩滄海望鉤膝白雲吟不是逍遙侶誰知世外心

訶陵樽

魚骼匠成樽猶殘海浪痕外堪欺玳瑁中可酌崑崙  
水繞苔磯曲山當草閣門此中醒復醉何必問乾坤

酒名

訓早春病中書事

祇貪詩調苦不計病容生我亦休文瘦君能叔寶清藥  
須勤一服春莫累多情欲入毗耶問無人敵淨名

又訓次韻

從來多遠思尤向靜中生所以令心苦還應是骨清酒  
香偏入夢花落又關情積此風流事爭無後世名

訓秋晚見題二首

為愛晚窓明門前亦懶行圖書看得熟隣里見還生鳥

啄琴材響僧傳藥味精緣君多古思攜手上空城  
何事樂漁樵巾車或倚橈和詩盈古篋賒酒半寒瓢失  
雨園蔬赤無風虫葉凋清言一相遣吾道未全消

別離

丈夫非無淚不灑離別間仗劍對樽酒恥為遊子顏腹  
蛇一螫手壯士疾解腕所思在功名離別何足歎

和初冬章上人院

每伴來方丈還如到四禪菊承荒砌露茶待遠山泉畫

古全無跡林寒却有煙相看吟未竟金磬已泠然

龔美題郊居十首次韻

近來唯樂靜移傍故城居間打修琴料時封謝藥書夜  
停江上鳥晴曬篋中魚出亦圖何事無勞置棧車

倩人醫病樹看僕補衡茅散髮還同阮無心敢慕巢簡  
便書露竹樽待破霜匏日好林間坐煙蘿近欲交

倭僧留海紙山匠製雲牀懶外應無敵貧中直是王池  
平鷗思喜花盡蝶情忙欲問新秋計菱絲一畝強

故山空自擲當路竟誰知祇有經時策全無養拙資病  
深憐久客炊晚信樵兒謾欲陳風俗周官未採詩

福地能容暫玄關詎有扉靜思瓊板字間洗鐵筇衣鳥  
破涼煙下人衝暮雨歸故園秋草夢猶記綠微微

水影沈魚器隣聲動緯車燕輕捎墜葉蜂懶卧焦花說  
史評諸例論兵到百家明時如不用歸去種桑麻

禹穴奇編缺雷平異境殘靜吟封籙檢歸興削帆竿白  
石堪為飯青蘿好作冠幾時當斗柄同上步罡壇

強起披衣坐徐行處暑天上階來門雀移樹去驚蟬莫  
問鹽車駿誰看醬瓿玄黃金如可化相近買雲泉  
野入青蕪巷陂侵白竹門風高開栗刺沙淺露芹根迸  
鼠緣藤桁飢鳥立石盆東吳雖不改誰是武王孫  
疎慵真有素時勢盡無能風月雖為敵林泉幸未憎酒  
材經夏闕詩債待秋徵祇有君同癖閒來對曲肱

和旅泊吳門韻

高秋能叩觸天籟忽成文苦調雖潛倚靈音自絕群茅



峰曾醺斗笠澤久眠雲許伴山中躅三年任一醺

次張廣文見酬和詩韻

獨倚秋光岸風漪學簞文玄堪教鳳集書好換鶯群葉  
墮平臺月香消古徑雲強歌非白紵聊以送餘醺

延陵張宰

春盡未離開之官亦似閒不嫌請薄俸為喜帶名山默  
禱三真後高吟十字還

季子有仲尼  
所書十字碑

祇應江上鳥時下

訟庭間

送人罷官歸茅山

呼僮曉拂鞍歸上大茅端  
薄俸雖休入明霞自足餐  
暗霜松粒赤疎雨草堂寒  
又鑿中峰石重修醮月壇

甫里集卷六

欽定四庫全書薈要卷一萬四千八十二

集部

甫里集卷七

唐 陸龜蒙 撰

五言絕句

人日代客子

是日  
立春

人日兼春日長懷復短懷遙知雙綵勝併在一金釵

築城詞二首

城上一抔土手中千萬杵築城畏不堅堅城在何處

莫歎將軍逼將軍要却敵城高功亦高爾命何勞惜

古意

君心莫淡薄妾意正栖託願得雙車輪一夜生四角

追和幽獨君詩韻

靈氣獨不死尚能成綺文如何孤定裏猶自讀三墳

春曉

春庭曉景列清露花<sub>還</sub>迤黃蜂一過慵夜夜棲香蕊

雜興

桃柰傍簷楹無人賞春華時情重不見却憶菖蒲花

鴈

南北路何長中間萬弋張不知煙霧裏幾隻到衡陽

寄遠

鬢亂羞雲卷眉空羨月生中原猶將將何日重卿卿

庭前

合歡能解恚萱草信忘憂盡向庭前種萋萋特地愁

洞房怨

玉插朝扶鬢金梯晚下臺春衫將別淚一夜兩難裁

江行

酒旗孤葉外樓影浪花中醉帆張數幅唯待鯉魚風

巫峽

巫峽七百里巫山十二重年年自雲雨環珮竟誰逢

歸路

漸入新豐路衰紅映小橋渾如七年病初得一丸銷

南塘曲

妾住東湖下郎居南浦邊  
閒臨煙水望認得采菱船

黃金二首

自古黃金貴猶沽駿與才  
近來簪珥重無復上高臺  
平分從滿篋醉擲任成堆  
恰莫持千萬明明買禍胎

夕陽

渡口和帆落城邊帶角收  
如何茂陵客江上倚危樓

殘雪

桂冷微停素峯乾不徧  
嵐何谿背林處猶覆定僧庵

古意

古態日漸薄新裝心更勞城中皆一尺非妾髻鬟高

大堤

大堤春日暮驄馬解鏤衢請君留上客容妾薦彫胡

金陵道

北鴈行行直東流澹澹春當時六朝客還道帝鄉人

離騷

天問復招魂無因徹帝閭豈知千麗句不敵一讒言



對酒

後代稱歡伯前賢號聖人  
且須謀日富不要道家貧  
寄南岳客乞靈蕪香

聞說融峯下靈香似反魂  
春來正堪采試為斲雲根  
山陽燕中郊樂錄

淮上能無雨回頭揔是情  
蒲帆渾未織爭得一歡成  
偶作

雙眉初出顰兩鬢正藏鴉  
自有王昌在何勞近宋家

有示

相對莫辭貧蓬蒿任塞門無情是金玉不報主人恩

秋思三首

桐露珪初落蘭風珮欲衰不知能賦客何似枉刀兒  
誰在嫖姚幕能教霹靂車至今思禿尾無以代寒菹  
未得同螯杵何時減藥囊莫言天帝醉秦暴不靈長

早春

雨冷唯添暑煙初不著春數枝花類小愁殺扈芳人

懷仙三首

聞道陽都女連娟耳細長自非黃犢客不得到雲房  
但服鐸剛子兼吟曲素詞須知臣漢客還見布龍兒  
神燭光華麗靈祛羽翼生已傳滄玉粒猶自買雲英  
芙蓉

閒吟鮑照賦更起屈平愁莫引西風動紅衣不耐秋  
春思

怨鶯新語澀雙蝶鬪飛高作箇名春恨浮生百倍勞

風人詩四首

十萬金師出遙知正憶君一心如瑞麥長作兩岐分  
破蘖供朝饗須憐是苦辛曉天窺落宿誰識獨醒人  
旦日思雙屨明時願早諧丹青傳四瀆難寫是秋懷  
聞道更新幟多應廢舊旗征衣無伴擣獨處自然悲  
樂府雜詠六首

雙吹管

長短裁浮筠參差作飛鳳高樓微月夜吹出江南弄

東飛鳧

裁得尺錦書欲寄東飛鳧  
脰短翅亦短雌雄戀菰蒲

花成子

春風等君意亦解欺桃李  
寫得去時真歸來不相似

月成弦

孤光照還沒轉益傷離別  
妾若是嫦娥長圓不教缺

孤獨怨

前回邊使至聞道交河戰  
坐想鼓鞞聲寸心攢百箭

金吾子

嫁得金吾子常聞輕薄名君心如不重妾腰徒自輕

子夜四時歌

春

山連翠羽屏艸接煙華席望盡南飛燕佳人斷消息

夏

蘭眼擡路斜鶯脣映花老金龍傾漏盡玉井敲冰早

秋

涼漢清沈寥衰林怨風雨愁聽絡緯唱似與羈魂語

冬

南雲走冷圭北籟號空木年年任霜霰不減篴簫綠

大子夜歌二首

歌謠數百種子夜最可憐慷慨吐清音明轉出天然  
絲竹發歌響假器揚清音不知歌謠妙聲勢出口心

子夜警歌二首

鏤椀傳綠酒雕鑪薰紫煙誰知苦寒調共作白雪絃

恃愛如欲進含羞出不前朱口發豔歌玉指弄嬌絃

子夜變歌三首

人傳歡負情我自未嘗見三更開門去始知子夜變  
歲月如流邁春盡秋已至熒熒條上花零落何乃駛  
歲月如流邁行已及素秋蟋蟀吟堂前惆悵使儂愁  
江南曲五首

魚戲蓮葉間參差隱葉扇鵲鵲鸛鸛窺漱灩無因見  
魚戲蓮葉東初霞射紅尾傍臨謝山側恰值清風起



魚戲蓮葉西盤盤舞波急潛依曲岸涼正對斜光入  
魚戲蓮葉南歌危午煙疊光搖越鳥巢影亂吳娃櫂  
魚戲蓮葉北澄陽動微漣回看帝子渚稍背鄂君船

甫里集卷七